

Cu un intercambio entre stakeholders Cuerpo Policial ta conmemora Dia Nacional Contra Traficacion di Hende



ORANJESTAD (AAN)--: Na Aruba, e taskforce contra traficacion di hende tur aña ta organisa un actividad riba Dia Nacional Contra Traficacion di Hende, riba dia 18 di october of den e mesun siman. Jeannette Richardson-Baars, kende ta coordinador di e taskforce ta splica cu ta importante pa pone e enfoke riba e dia aki, como cu explotacion di hende ta un problema

mundial ta esencial pa nos comunidad ta consciente di e señalnan y specialmente pa tur gruponan di interes keda informa tocante desaroyonan local y mundial. Traficacion y explotacion di hende ta presenta na tur pais, sea e ta pasa na e pais mes of ta pasa e hendenan cu ta wordo trafica via di e pais, Aruba no ta un excepcion. Richardson-Baars a splica

cu frecuentemente loke ta hunga un papel ta cu tin cierto cos cu miembronan di nos comunidad no ta “wak” mas, nan a custumbra cu esaki y no ta realisa cu por ta trata un caso di traficacion di hende. Ta p’esey tambe e campaña di e taskforce yama “Habri bo wowo”, cual ta conduci na conscientisacion, melding y ta habri e porta pa Cuerpo Policial y su partnernan por brinda ayuda na e victimanan, el a añadi.

E taskforce, pa medio di Slachtofferhulp, cual tambe ta resorta bao di Cuerpo Policial, tin e hotline, telefon #5923231, cual ta habri 24 ora pa dia, shete dia pa siman. Casonan urgente ta wordo identifica y pasonan ta wordo tuma di biaha pa ofrece yudansa urgente, manera shelter, cuminda y paña si mester. Pa un afspraak cu miembroman di e taskforce of pa pidi informacion por tuma contacto cu e taskforce tambe pa medio di lcmm@kparuba.com.

No por bisa cu e situacion ta alarmante na Aruba, manera China, Pakistan, Rusia of Merca, pero no mag pensa cu explotacion y traficacion di hende no ta existi aki. E taskforce ta ricibi cuatro pa seis

melding pa aña y no tur ta bira investigacion. Richardson-Baars ta subraya cu aunke esaki compara cu e situacion den e otro paisnan ta relativamente chikito, “UN victima di traficacion di hende ta uno dimas!”

E taskforce di Aruba ta wordo considera un ehempel pa organisacionnan internacional. For su establecimiento na 2007, e werkgroup a sinta hunto, pensa logico riba e problematica mundial aki y a bin cu diferente conseho pa gobierno kico pa haci y con pa crea conscientisacion.

Aruba su esfuersonan a resalta, a capta atencion di Organization of American States y e departamento di estado Mericano trahando riba e tereno aki. E Office to Monitor and Combat Trafficking in Persons y Hillary Clinton a invita Jeannette Richardson-Baars pa ricibi un reconocimiento internacional, esta TIP Hero Award na Washington. Ademas, Aruba ta wordo pidi pa duna les na representantenan di otro islanan con pa organisa nan mes, con pa traha cu poco financiamiento y cu recursoronan humano limita.

Jeannette Richardson-Baars a elabora cu no ta necesario pa pone un sistema of organizacion complica, e mester ta simpel, pero efectivo.

Richardson-Baars a bisa cu



ta esencial pa keda cu nos wowonan habri pa e problematica di traficacion y explotacion di hende y raporta cosnan cu no ta “sinti” normal. “E por ta e cria cu ta biba na nos bisiña, e por ta e handyman cu ta biba paar di cas mas leu, e por ta e loverboy cu tin un mucha muhe bao di su control, e por ta e muchanan cu ta den e supermercadonan Chines. Eigenlijk nos no ta pensa suficiente kico esey por ta. Si tinun situacion cu abo ta pensa ta straño, probablemente algo ta andando. Meld esaki pa nos por traha cune,” Richardson-Baars a expresa.

“Habri bo wowo pa cosnan cu bo ta pensa bo ta conoce pero por tin un situacion di explotacion eynan,” el a conclui bisando.

END